

Hibru

Hibru bin bi Kraiss kid ar midelak okok kirop mij ñu kil tikak

God Ñi ne cinop minim tep ñak

1 ¹Ned God ne apis based cin Juda bin bi okok kirop minim agniḡ, bi minim agep ne okok ar ke ke gos ñek, kiri niñil ag ñöligipal. ²Pen ñin kißen midobin aul, Ñi ne ke ag yokek apil cinop minim ag ñib. God agek, Ñi ne karip lim tap okok magilsek birarik ped okok gi lak. God agek, Ñi ne karip lim tap okok magilsek kod mideniḡab. ³Nap melik kib sek mideb rek ak, Ñi ak rek nep melik kib sek mideb. Nap bi ti gep bi rek mideb ak, Ñi ne akniḡ rek nep mideb. Ñi minim kilis yib ne agek, karip lim tap okok magilsek midep nep mideb. Ñi ne apil, cinop bin bi magilsek nen agil kimil, bin bi magilsek okok tap si tap timel gipal okok magilsek lig gi ke okok yokil, kauyaḡ warik ap ran Nap kilis ke sek mideb ak ñinmagil yipid pis ken ar ne eip bisig ḡil midebir.

Ejol okok piyak rek midebal; God Ñi ne Bi Kib yib mideb

⁴God ne gek, Kraiss ne ejol okok rek mer; ne Bi Kib mideb. God ne Kraiss nop Ñi yad agak ak, yib ne ejol yib rek mer; yib ne i ar oklaḡ siḡak mideb. ⁵God Minim dai alap God minim agil agak,

“Yad miñi nep agebin, nak Ñi yad mideban,
yad Nap nak midebin,” agak.

Pen minim niḡak God ne ejol alap ma agak. ⁶Pen Ñi ne ned ak lim dai aul ag yokniḡ gak ñin ak, God ne ejol ne kirop agak,

“God ejol okok magilsek yib nop agel ar amnaḡ,” agak.

⁷Pen ejol okok minim agil God agak,

“God ejol ne okok gek,

- ñin alap yigen rek dil opal.
 Wög gi ñeb bi ne okok gek,
 ñin alap mab milañ rek dil opal,” agak.
- 8 Pen God ne Ñi ne nop minim agil agak,
 “Nak God. Nak Kiñ per nep per nep midil,
 bin bi nak okok per nep kod midenigan.
 Bin bi nak kod midil, gi tep gil,
 yipid gil nep gil, kod midenigan.
- 9 Bin bi gi tep gel,
 nak miñ miñ gipan,
 pen bin bi tap si tap timel gel,
 nak milik kabiam nipan.
 Nib ak, yad, God nak, gen,
 nak nep Bi Kib ke yib mideban;
 bi niñep nak okok mok nak okok midebal,” agak.
- 10 God minim ognap sek agil agak,
 “Bi Kib, nak ke birarik ped okok nep midil,
 lim dai wagin aul gi lil, seb kab siñak ñinmagil nak gi linak.
- 11-12 Tap nib okok won alap midil, kir ginig geb,
 pen nak midep nep midenigan.
 Tap nib okok, walij ajil li yapek,
 tig asik ke siñak lil, kisen nib tol gipal rek, ginigan.
 Pen nak Bi Kib, ned mideligipan rek,
 miñi nib aknib rek nep mideban;
 ke alap ma linigan; miñi mideban rek
 kisen nib aknib rek nep per nep per nep midenigan,” agak.
- 13 God Minim dai alap God minim agil agak,
 “Nak ñinmagil yipid pis yad siñaul bisig midek,
 tap tari tari nep kausal maual rek mideb okok magilsek,
 talak miñan nak okok linigain,” agak.
- Pen minim nibak God ne ejol alap ma agak. 14 Nib ak, ejol okok tari rek midebal? God kirop ag yokek, nop wög gi ñilig gi, bin bi Kraisi di komiñ yokek seb kab ar alañ siñak God eip per nep komiñ midenigan bin bi okok kirop gi ñibal.

God cinop dak ak tap kib yib

2 1 Nib ak, minim ag ñel nipin ak, niñ di kilis gil, gos niñlig gi nep midon. Pen niñ di tep ma ginigabin ak, gos esek ar ognap niñil, minim esek pis kid okok amnin rek lip. 2 Ejol okok nep lo minim ak damil, Mosis nop ñilak ak pen minim nibak minim niñid nep midek niñlig gi, bin bi minim nibak won alap ageb rek ma gilak okok abe, bin bi won alap tib tiklak okok abe, yur pen dilak. 3 Nib ak, cin God Ñi ne

minim tep dowip ak kirig genigabin ak, cin komiņ amjin rek ma linigab. Bi Kib ne ke minim nibak dad apek, bin bi minim ne nibak niņlak okok, minim niņid yib nibak niņnimib, agil, cinop ag ñi tep gilak. ⁴Pen gos kiri ak nep niņil ma aglak; God kirop eip midek niņlig gi, tap niņep ma niņep rek ognap gilig gi, tap ma gep rek ognap gilig gi, cinop ag ñilak. God gos ne ke niņil Kaun Siņ ne ak bin bi ognap tap tep ñek, ke yib gelak ak, ak rek nep niņnok. Nib ak me, Kraiss minim tep ak niņid yib agebal, agil niņnok.

Jisas cinop tau adik dil cinop ai mam yad agip

⁵Pen God cinop di ne eip seb kab ar alañ siņak lek per nep midenigabin minim agebin ar ak, ejol okok bi kib ar oklaņ rek, cin piyak rek, ma midonigabin. ⁶Minim ar nibak, God Minim ak ñu kil tikil aglak, “God. Nak bin bi okok kirop gos niņil dipan.

Pen kiri nak ke rek ma midebal;

kiri bin bi yokop rek ak,

nak tari ginig kirop kod mid tep gipan?

⁷Nak genak, won ulep alap ejol okok bi kib rek midelak,

bin bi okok piyak siņak rek midelak ak

pen miņi bin bi okok kirop gek, kiri yib midek,

⁸ tap magilsek okok kod midenigal,” aglak.

God gek bin bi tap magilsek okok kod midenigal, aglak ak niņil cin nipin tap magilsek bin bi mok kiri siņak midenigab. Pen miņi cin nipin tap magilsek bin bi mok kiri siņak ma mideb.

⁹Pen Jisas gak ak nipin. God Jisas nop ag yokek lim dai ar wagin aul apil midek ñin ak, ejol okok bin bi kib rek midelak; Jisas ne bi yokop sikol rek midek. Pen God ne bin bi yimiņ niņip rek, Jisas bin bi magilsek okok di komiņ yoknim, agil, yur kib dil kimek, God gek miņi Bi Kib melik sek mideb niņlig gi, yib ne agel ar ameb.

¹⁰God ne tap okok magilsek gi lil kod mideb ak, bin bi koņai nep di karip lim tep yib ne ak di liniņ, Jisas ag yokek apil yur ke yib dek, God nop kau tep ke yib ne ke ak ñak. Tari ginig: Jisas ne ke gak minim tep ak niņ dil, bin bi koņai nep kau tep ke yib nibak Jisas eip am midenigal.

¹¹Pen bin bi tap si tap timel acir ak lig gi yokeb Bi nibak abe, bin bi miņi acir sek ma midebal okok abe, Nap kiri nokim. Nib ak, Jisas bin bi nib okok kirop, ai mam yad sikop okok, agil agek nop nabiņ ma gip. ¹²Jisas ne God nop agak,

“Ai mam sikop yad okok kirop kesim nak ak dil yib nak ak ag ñinigain;

nep sobok ginig mogim gil, kimep aglig gi,

yib nep agen ar amnigab,” agak.

¹³Pen minim alap agak,

“God ne yip kod tep ginigab, agil gos ak niñil,
 gos sek midenigain,” agak.
 Pen minim alap agak,
 “God ñi pai yip ñak okok eip midebin aul,” agak.

Krais bin bi dinim, agil, bi rek mið goñ lil, owak

¹⁴“Ñi pai yip ñak” agak ñi pai nið okok kiri bin bi yib ak me, ne bi yib alap lil apil, Seten bin bi lip gi dek kimbak bi ak nop ñag pak linig kimak. ¹⁵Nig gek me, bin bi kimnigabin, agil, per nep gos par niñil bi nagiman rek midebal okok, kirop wisib yokek per per nep komiñ midenimel rek lip. ¹⁶Pen Krais nig gak ak, ejol okok di tep ginim, agil, ma gak; Ebrahim ñi pai di tep ginim, agil, nig gak. ¹⁷Ar nibak nep, Krais apil cin ai mam ne midobin rek bi yib rek lil, bi God nop tap sobok gep tep yib ak midil, bin bi mid tep ma gipal okok kirop yimig niñil di tep gil, per nep God nop wög gi ñi tep gilig gi midek, God ne bin bi tap si tap timel gipal okok gac nibak niñil kirig ginigab. ¹⁸Pen apil lim dai ar wagin aul midil, cinop miker tari tari gip ak, nop ak rek nep gek ne ke niñ tep gip rek, cinop yimig niñil kod mid tep ginigab.

Jisas bi kib; Mosis bi sikol

3 ¹Ai mam sikop yad. God nibep ak rek nep minim tep ne agek, cin God bin bi ne ke midobin. Jisas ne bi God minim tep dam ñeb bi ak. Jisas ne bi God nop tap sobok gep bi kib yib ak. Cin Jisas minim tep ak niñ dil, God Minim ageb rek nep ginigaun ak, Jisas ne per nep cinop gi ñib. Nib ak, nið per nep Jisas nop nep gos niñlig gi midenimib.

²Mosis God minim agak ak niñil, God bin bi ne dil kod mid tep gologip. Nig aknið rek nep Jisas God minim agak ak niñil magilsek gi tep gak. God Jisas nop wög nibak ag lak. ³Bi alap karið gi linigab ak, bin bi okok niñil karið yib agel ar ma amnigab; bi alap karið gi linigab ak, bin bi okok niñil bi nibak nep yib ne agel ar amnigab. Ar nibak rek nep, God Mosis nop di tep gil gek, bin bi Mosis bi kib apal; pen Jisas yib kib yib mideb rek, bin bi yib ne agel ar i oklañ siñak amnañ. ⁴Karið kineb alap ke miseñ ma lip; bi gi lel mideb. Ar nibak rek nep, tap tari tari mideb okok magilsek God ne gi lek mideb.

⁵Mosis God bin bi ne nab siñak wög gi ñi tep gilig gi, God cinop kisen minim tari agnigab ak, minim tep ognap ag ñak. ⁶Pen Krais God Ñi ne yipid gil mideb ak me, cinop God wagin ne midobin okok, bi karið nap nið rek midil kod mid tep gip. Tap tep kisen dinigabin ak niñ dil gos sek midenigabin ak, bin bi ne nep midenigabin.

God minim tep ak niñ dilig gi midil, ma kirig ginimib

⁷Nið ak, Kaun Siñ agak rek niñin. Ne agak,

“Ñin aul God minim peyig niñenimib ak,
minim ne ak niñ dinimib.

8-9 Napis nased sikop birarik nep,
mi ñin juil omal (40) miñ mab kab nep mideb nab okok midelak,
kirop tap ma gep rek okok gilig gi, kod mid tep ginek ak pen
God ne cinop tari ginigab, agil, minim yad ak ma niñil,
gos kiri ke nep niñil gel amoligip.

Napis nased sikop gilak rek ak, nibi God minim ma ag junimib.

10 Nig gelak, yad napis nased sikop okok niñen milik yapek agnek,
‘Kiri per nep yip yo niñil, minim yad kisen ma gipal,’ agnek.

11 Nig gelak, yad kirop niñen milik yapek,
‘Karip lim tep amil, yad eip midil,
ake lil mid tep ginimel, agnek ak, ma amnigal,’ agnek.

Minim kilis agil pis nep mer agnek!” agak.

12 Nib ak, ai mam sikop. Tap si tap timel gil, God komiñ mideb ak minim
ne ak kirig gil, gos nibi ke niñnimib rek lip ak, niñ tep ginimib. 13 God Minim
dai agesin ak ageb, “Ñin aul God minim peyig niñenimib ak, minim ne ak
niñ dinimib,” ageb. Nib ak, miñi cin “Ñin aul” midobin ak, per per ñin nokim
nokim nanai namam sikop eip Kraiss minim tep ak ag amil apil gil, pen pen
ag ñil, gos sek midenimib. Mer ak, Seten nibep tap si tap timel gep minim
esek ognap agil nibep lip gi dad amek, Kraiss minim tep ak kirig ginigabim.

14 Ned Kraiss minim tep ne ak niñil, minim ne niñ di kilis gil, nop cig
tep ginok ak rek, kisen per nep kilis gil nib aknib rek nep Kraiss minim
tep ne ak niñ di kilis gil, nop cig tep gil gos sek midenigabin ak, Kraiss
bin bi ne midil nop eip jim ñil wög ginigabin.

15 God Minim dai agesin ak ageb,
“Ñin aul God minim peyig niñenimib ak,
minim ne ak niñ dinimib.

Napis nased sikop birarik nep,
God ne cinop tari ginigab, agil, minim yad ak ma niñil,
gos kiri ke nep niñil gel amoligip.

Napis nased sikop gilak rek ak, nibi God minim ma ag junimib,”
agak.

16 Mosis ne Isrel bin bi dil Ijip nib dowak bin bi nib okok nep magilsek
God minim niñil yo niñlak. 17 Mi ñin juil omal (40) Isrel bin bi tap si tap
timel gi midel, God kirop milik yaplig gi midek niñlig gi, miñ mab kab
nep midoligip nab okok midil koñai nep kim saklak. 18 Pen Isrel bin bi
per nep God nop yo niñil, minim ne agak rek ma gilak ak me, God ne
minim kilis agip, “Yad nibep niñen milik yowip. Karip lim tep amil, yad
eip midil ake lil mid tep ginimib agnek ak, ma amnigabim,” agil, pis nep
mer agak. 19 Nib ak nipin, minim ne ma niñ dilak ak me, am karip lim
tep ake lil mid tep geblap sijak amnimel rek ma lak.

4 ¹“Nibi karip lim tep amil, yad eip midil ake lil mid tep ginigabim,” agak minim ak Isrel naxis nased sikop ma niŋ dilak. Pen miñi God cinop nep minim niŋid nibak ageb. Nib ak, nibi magilsek niŋ tep ginimib, cin magilsek karip lim tep amil, God eip midil ake lil mid tep gin, agil gos niŋnimib. Nibi niŋ tep ginimib, God nibep, “Bin bi wagin nokim alap tap tep ñinigain agnek ak ma dinigabim,” nibep nib agnimin rek lip. ²God gek Kraiss minim tep ak Isrel bin bi kirop ag ñel niŋlak rek, cinop ak rek nep Kraiss minim tep ak ag ñel niŋnok. Pen Isrel bin bi Kraiss minim tep ak niŋil, niŋid ageb, agil, ma niŋ dilak. Nib ak, Kraiss minim tep ak kirop ma gi ñak. ³Pen cin bin bi Kraiss minim tep ak niŋil, niŋid ageb, agil niŋ dipin okok, God ne agil, “Nibi karip lim tep amil, yad eip midil ake lil mid tep ginigabim,” agak ak, minim niŋid nibak rek ginigabin. God agak,

“Nig gelak, yad kirop niŋen milik yapek,
 ‘Karip lim tep amil, yad eip midil,
 ake lil mid tep ginigal,” agnek ak, ma amnigal,’ agnek.
 Minim kilis agil pis nep mer agnek!” agak.

God nib agak ak pen ne birarik ped okok karip lim aul ma gi lak ñin ak, tap magilsek ginigab okok magilsek bir gos niŋil ginigain agak.

⁴God Minim ak dai alap udin li niŋil, ñin ar oŋid ak minim ognap niŋnigan. Minim nibak ñu kil tikil aglak, “God ñin akniŋ kagol oŋid karip lim tap okok magilsek gi li sakil, ñin ar oŋid ak ake linim, agil, yokop midek,” aglak.

⁵Pen God Minim dai midarik nep agesin nibak, God agak, “Karip lim tep amil, yad eip midil, ake lil mid tep ginigal agnek ak, ma amnigal,” agak.

⁶God gek Kraiss minim tep ak Isrel bin bi kirop ag ñilak pen niŋil, niŋid ageb, agil, ma niŋ dilak. Nib ak me, karip lim tep amil, God eip midil ake lil mid tep giplap ak, ma amnilak. Pen bin bi ke nib ognap amnigal. ⁷Nib ak, bin bi minim ne niŋil kirig gilak okok kimel, mi koŋai nep yinek, based acik Depid God Minim ñu kil tikil, minim won miñi nep agesin ak agil agak,

“Ñin aul God minim peyig niŋenimib ak,
 minim ne ak niŋ dinimib.
 God minim ne niŋenimib ak,
 yirik gip agil ma yo niŋnimib,” agak.

Pen God kauyaŋ, “Ñin aul” agak ak me, cin niŋin, ñin ne bin bi dinigab ñin ak ma owip; midep nep mideb.

⁸Pen nibi agnigabim, “God birarik nep, ‘Karip lim tep amil, yad eip midil ake lil, mid tep ginigabim,’ agak ak, bi kib Josua apis based sikop kirop dam karip lim Kenan amek, mid tep gilak ar ak agak,” agnigabim. Pen ñin nibak nep ma agak; kiri amil karip lim Kenan midel niŋlig gi,

minim nibak kauyanj agak. ⁹Nib ak, God ne ñin ar oñid ak ake lil mid tep gak rek, bin bi ne ak rek nep ake lil mid tep ginigal. ¹⁰God ñin kagol oñid wög gil, ñin ar oñid ak ake lil yokop midek rek, bin bi an an God karip lim tep sñak amnigal okok, kiri nib aknib rek nep wög gipal ak kirig gil, ake lil, yokop am ne eip mid tep ginigal. ¹¹Nib ak, karip lim tep nibak amil, God eip midil ake lil mid tep ginigabin agak minim ak, niñ di kilis gil, kilis gil God Minim ageb rek nep gilig gi midon. Nig aknib rek genigabin ak, Isrel bin bi ned God minim agak ak ma niñ dil, karip lim tep ma amil, ap yap paklak rek ak, cin bin bi nokim alap aknib rek ma ginimiñ.

¹²Tari ginig: God Minim ak komiñ nep mideb. God Minim ak, tap tari ginig ginigab. Tu par kid okok magilsek arik gip; God Minim ak kid yib. Nab cinop eyañ amil, gos timid midmagil ke lil kaun ke lil ginigab; nab cinop eyañ amil, tiñil gol ke lil tiñil silom ke lil ginigab; nab cinop eyañ amil, gos tep nipin aka gos timel nipin ak, di miseñ lek niñ tep ginigabin. ¹³Tari tari genigabin okok, God niñ mideb niñlig gi ginigabin; kapkap we gil gijin rek ma lip. Pen ne nep cinop minim kib agil, tap tari tari gipin minim ak ag niñek niñlig gi nop ag ñinigabin.

Jisas God nop tap sobok gep Bi Kib yib mideb

¹⁴Nib ak, God Nop Tap Sobok Gep Bi Kib Yib cin ak, God Ñi ne Jisas ak, amil Nap eip mideb rek, Kraiss minim tep niñ dipin ak, niñ di kilis gilig gi midon. ¹⁵God Nop Tap Sobok Gep Bi Kib Yib cin ak apil lim dai ar wagin aul midoligip rek, tap si tap timel cinop lip gi di amnimiñ rek lip okok abe, miker cinop tari tari gip okok abe, nop ak rek nep gak ak pen ne gi timel ma gak. Nib ak, miker tari tari cinop ginigab ak, God Nop Tap Sobok Gep Bi Kib Yib cin ak niñ tep gip rek, cinop yimiñ yib niñil, ¹⁶bi nab nib cin tep yib ak mideb. Nib ak, cin gac sek midobin ak, God nop pirikil, ma kirig gin. God cinop yimiñ niñil, Ñi ne nop ag yokek apil kimak rek, God sea kiñ bisig mideb ulep sñak amenigabin ak, ne cinop yimiñ niñil di tep gil kod mid tep gek kapkap mid tep ginigabin.

5 ¹Bi God nop tap sobok gep bi kib okok magilsek, bi yokop bin bi nab okok nib ak pen God kirop ag lek, bi nab nib midil wög ne ak gipal. Bin bi tap si tap timel gipal ak niñil, kaj meme aka kaj sipsip dap bi God nop tap sobok gep bi kib okok kirop ñel, kiri pen bid ar ak pak dagil, God nop sobok gi ñibal. Wög kiri alap pen, bin bi God nop gos niñel tep gek, tap ognap dap bi God nop tap sobok gep bi kib okok kirop ñel kiri tap nib okok God nop sobok gi ñibal. ²⁻³Pen bi God nop tap sobok gep bi kib nib okok, kiri ke bi yib midebal ak me, kiri ke ak rek nep tap si tap timel gipal. Nib ak, bin bi ognap okok tap si tap timel kiri gipal ak abe, kiri ke tap si tap timel gipal ak abe gos niñil, God nop tap sobok gi ñibal. Nib ak, bin bi niñ tep ma gipal okok ap yap pakniñ ginigal ak, God nop

tap sobok gep bi kib okok kirop yimig niñil, minim sisain apal. ⁴Kiri ke, bi kib midon, agil, wög nibak ma dipal; God Eron nop ag lek wög nibak goligip rek, kirop niğ aknib rek nep ag lek gipal.

⁵Ar nibak nep, Krais ne ke, yad bi God nop tap sobok gep bi kib yib midenim, agil ma agak; God nep nop agak,

“Nak Ni yad;

miñi yad Nap nak,” agak.

⁶Pen God Minim ak dai alap udin li niñil, God minim alap sek agak ak nipin. Ni ne nop agak,

“Melkisedek ne yip tap sobok gep bi midoligip rek ak,

nak yip tap sobok gep bi per per nep midenigan,” agak.

⁷Pen Jisas lim dai ar wagin aul midil, nop ñagnig gelak, Nap nop sil aglig gi, meg migan dap ranil sobok gilig gi midek. Nap nop ag niñil agak, “Yip kod midenimin. Pen nib nib ginimin ma agebin; nak ke gos nipan rek yip ginimin,” agak. Jisas nib agek, God minim nop niñil, ag niñak rek nep gak.

⁸Jisas ne God Ni ne yib ak pen ne miker dil koslam midoligip ak, yad titi gil Biñen minim agnigab rek ginigain, agil gos niñil, niğ aknib rek nep gek. ⁹Pen Nap minim tari agak, magilsek gak ak me, ne bin bi minim ne niğ dil kisen gipal okok tig asik yokek, kiri karip lim tep seb kab ar alaņ siñak amil per per nep komiņ nep mid tep ginigal. ¹⁰Pen ar nibak nep, God Jisas nop agak, “Melkisedek ne yip tap sobok gep bi midoligip rek ak, nak yip tap sobok gep bi kib yib midenigan,” agak.

God minim yibim yib ak niņ tep gil, niņ di wös ginimib

¹¹Minim nu kil tikebin nib aul rek koņai mideb ak pen kasek ma nipim ak rek, koslam agen niņnigabim. ¹²Nibep God Minim per ag niñbin ak, nibi niņ tep gil bin bi ognap kirop ag niñbkep ak pen kasek ma nipim rek, minim ned nipkep minim ak nibep kauyaņ ag niñ. Miñi tap kilis tegilpkep ak pen miñi ci nep tegil midebim. ¹³Ni painaņ ci tegil nep midebal okok, miñ ar ak tep, miñ ar ak timel, agil ma nipal. ¹⁴Pen bin bi gos sek okok gi damil, ar ak gep, ar ak ma gep, agil niņ tep gipal. Kiri tap magil yib niñbal.

God minim yibim ak niņ din

6 ¹Krais minim tep nibep per ag niñbal okok, kauyaņ agil kauyaņ agil ma agnigain. Karip ginig, sap piñil niğ kauyaņ tig juil, kauyaņ ak piñil nig, kauyaņ ak piñil nig, ma gipal. Nib ak, cin ke nep kil tep gil me, God bin bi ne midenigabin, ag gos niñoligipin ak pis nep kirig gil, God Ni ne nop ag yokek cinop nen agil kimak minim tep ak pis nep niņ din. Sap ak tig juil, tol gil, tig juil, tol gil, aknib ma gin. ²Niğ pakpal minim ak; God kirop di tep ginim, agil, niñmagil nabıc ar lipal minim ak; bin

bi kimil warikpal minim ak; God bin bi magilsek minim kib agil kirop nonim lek ognap yur per dinigal minim ak; minim nibak kauyañ ma agnigain. Krai minim tep ned nipek nib okok, gos niñ nep midlig gi, Krai minim tep ognap sek niñnigabim ak tep. ³Nib ak, God cinop kod midek niñlig gi, Krai minim tep ognap sek ag ñon niñnigabim.

⁴Bin bi Krai minim tep ne niñ dil, kisen kirig ginigal okok, kiri kauyañ tap si tap timel gipal ak cib niñil, Krai minim tep ne ak ma niñ dinigal. Kiri God melik tep ne ak bir niñlak; God tap tep seb kab ar alañ nib ñib ak bir niñlak; Kaun Siñ ne kirop nab adañ bir owak. ⁵God Minim tep ak yidek yib gip ak bir niñlak; God ne bin bi kariñ lim wagin aul kod midenigab ak, kilis ne ak bir niñlak. ⁶Tap nib okok magilsek bir niñlak ak pen Krai minim tep ak kirig gilak. Nib ak, kiri kauyañ tap si tap timel gipal ak cib niñil, Krai minim tep ne ak ma niñ dinigal. Tari ginig: God Ñi ne ak kauyañ mab kros bak alañ ñag pak lel bin bi okok nop ag junigal.

⁷Lim siñak yiñ yimel, miñab paklig gi paklig gi, yiñ tan tep gil tap magil pil tep gek, bin bi ñi pai wög nibak ñiñnig gipal okok ñiñnigal. Niñ gek God lim nibak miñ miñ gil tap tep ñinigab. ⁸Pen lim siñak yiñ yimel, miñab paklig gi paklig gi, kipil ñu ñu sek okok nep tanek, tap magil ma pilnigab ak, lim nibak lim timel yib. God lim nibak minim kilis agek mab ke eyañ yinnimiñ rek lip.

⁹Pen bi niñeb tep yad okok. Minim kib rek agobin ak pen nibi ke Krai minim tep ak kirig gipim, agil ma agobin; niñ tep ginimib, agil agobin. Tari ginig: Krai bin bi ne midil, bin bi ne okok gipal rek gipim ak nipin. ¹⁰God abramek ma ginigab; ageb rek nep ginigab. Nibi ned God nop wög gil, midmagil lil, bin bi ne kirop di tep gil gi ñibek ak abe, miñi ak rek nep di tep gil gi ñibim ak abe, ne saköl ma ginigab. ¹¹Pen cinop tep ginigab ak, nibi magilsek ar nibak nep per nep gilig gi mid damil mid damil, amil God eip per nep mid tep gin, ag gos nipim rek, ginigab.

¹²Nibep yirik marik ginimiñ rek lip ak, niñ tep ginimib. Krai minim tep ne ak niñ di kilis gil, miker apek kilis gil gos sek midebal bin bi okok, God tap tep ñinigain agak ak dinigal. Nibi nib aknib rek nep gilig gi midem, nibep tap tep nibak ñinigab.

¹³God based acik Ebrahim nop minim niñid ak agniñ, bi kib God rek alap sek ma midek niñil, bin bi ognap yib kirop ma agak; yib ne ke agil agak, ¹⁴“Yad midebin rek, nep minim niñid yib agebin, nep kod miden niñlig gi, bin bi nak koñai yib midenigal,” agak. ¹⁵Ebrahim minim ne nibak niñil, kapkap kod midek midek, God tap tep agak ak dak.

¹⁶Cin bin bi, minim kilis niñid yib agniñ, bi pobin alap yib ne agil, niñid yib agobin, apin. Niñ gon, bin bi okok niñil ak rek nep, minim nibak niñid yib agebal, apal. ¹⁷Nibak rek, God yib ne ke agil, “Yad midebin rek, nep minim niñid yib agebin,” agak ak, bin bi okok kisen

ñi pai tik donigal okok, yad gos kisen niñil ar ke ma ginigain ak niñ tep ginimel, agil, minim nibak rek agak. ¹⁸Nib ak, cin bin bi tap si tap timel gil, pirik gil God nop pis ken opin bin bi okok, niñid nep tap tep kirop ñinigain agak ak dinig gebin, agil, gos sek midon. God yib ne ke agil, yad midebin rek, agak; nep minim niñid yib agebin, agak. Minim omal agak ak, God minim esek agniñiñ rek ma lip. Ke ma ginigab. ¹⁹God Karip Magil Ñilik Migan Siñ Ke Yib ak walij bad karik yipil yokek, nop udin ma nipin ak pen minim niñid yib ak agek, gos nokim nibak nep niñil, gos sek nop kod midobin. Minim niñid yib nibak, God karip magil ñilik migan ne ak amib ak me, kab kilis rek mideb; kikaun kikaun ma ginigab. ²⁰Melkisedek ne bi God nop tap sobok gep bi midoligip rek ak, Jisas ne God Nop Tap Sobok Gep Bi Kib Yib cin ak lil, God Karip Magil Ñilik Migan Siñ Ke Yib ak ned amil, cinop nen agil Nap nop sobok gilig gi mideb. Ne God Nop Tap Sobok Gep Bi Kib Yib per per nep midenigab.

Kiñ alap bi God nop tap sobok gep bi midoligip

7 ¹Melkisedek nibak ne kiñ midil, bin bi karip lim Salem kod midlig gi, bi God kilis sek yib ak nop tap sobok gep bi ak, ak rek nep midoligip. Pen kiñ ognap apil, based acik Ebrahim nop gi timel gelak, kirop yok gi yokil, tap tep tep kiri okok dad apek niñlig gi, Melkisedek apil nop kanib nab siñak niñil, God nop sobok gil, Ebrahim nop kod midenimin agak. ²Melkisedek nib agak niñil Ebrahim tap pili gi dowak okok, magilsek nonim li Melkisedek nop won nokim alap ñil, ne ke won akniñ ajip alañ dak. Pen Melkisedek yib ne ak jii omal mideb. Yib ne Melkisedek ak tig adik gil, “Kiñ Tep Yib Nep Gip” apal. Pen ne karip lim Salem kiñ midoligip ak, yib nibak tig adik gil, “Kiñ Kapkap Sain Tik Midep Magil Ñib” apal.

³Melkisedek ne bi God nop tap sobok gep bi ak pen nonim jii ar ak nig gil mideb, nap nised jii ar ak nig gil mideb, agil agel ma nipin. Pen nop ñu kil tiklak ñin ak, nonim tik dowak ñin ak, agil agel ma nipin; kimak ñin ak, agil ak rek nep agel ma nipin. Ne per nep bi God nop tap sobok gep bi mideb rek, ne God Ñi ne rek mideb.

⁴God based acik Ebrahim nop niñek tep gek, bi kib midenigan, agak minim ak niñil nipin, ne bi kib midek. Pen Ebrahim Melkisedek nop bi kib yib midek ak niñil, tap pili gi dapek okok, nonim li nop won nokim alap ñil, ne ke won akniñ ajip alañ dak.

⁵Ak ned yib nig gak. Kisen Mosis nop tik dapelak kib gil, God Minim ak dai alap ñu kil tikil agak, “Ebrahim tikek tik damil, bin bi Lipai wagin midebal okok God nop tap sobok gep wög gi midel niñlig gi, nibi Isrel bin bi okok magilsek, mani tap tari tari dinigabim okok, kirop nonim li won nokim nokim dap ñil, nibi ke akniñ ajip alañ ak dinimib,” agak. Nib ak, cin Mosis lo ar ak niñil nipin, kiri magilsek Ebrahim wagin

ne mideligipal ak, pen namam Lipai wagin mideligipal okok kirop per won nokim alap nonim li ñöligipal.

⁶Pen God based Ebrahim nop agak, “Bin bi nak okok kirop di tep ginigain,” agak. God minim agak ñin ak, Ebrahim ne bi ognap kirop tap ma ñöligip; pen Melkisedek apil Ebrahim nop niñil, God nop sobok gil, Ebrahim nop kod midenimin agek, Ebrahim tap dowak okok won nokim alap nonim lil Melkisedek nop ñak. Pen Melkisedek Lipai wagin bi alap ma midoligip. ⁷Cin nipin, bi alap apil bi alap God nop sobok gil, bi nibaul nop kod midenimin agenigab ak, bi God nop sobok ginigab ak bi kib, bi alap bi sikol. Nib ak, cin nipin Melkisedek bi kib, based Ebrahim bi sikol. ⁸Bi Lipai wagin Isrel bin bi won nokim nonim li ñöligipal ak dil, mid damil milep lil kimlak. Pen Melkisedek ne Ebrahim won nokim alap nonim li ñak dak ak, God Minim ak ñu kil tikil, Melkisedek kimil wög ne kirig gak, agil, ma aglak.

⁹⁻¹⁰Ebrahim Melkisedek nop tap nonim li ñak nibak, ñi pai ma tik dowak ñin ak ñak. Kisen me, Aisak nop tikek, Aisak pen Jekop nop tikek, Jekop Lipai nop tikek, tik amil apil gel, Lipai bi nib okok God nop tap sobok gep bi wög gel niñlig gi, Isrel bin bi okok mani tap kiri okok kirop nonim li ñöligipal. Pen Ebrahim Melkisedek nop tap nonim li ñak ak, kirop ma tik dolak won ak ñak ak me, Ebrahim abe, nised ne Lipai wagin abe, Melkisedek nop nonim li ñeb rek nep midelak ak nipin.

**Bi God nop tap sobok gep kisen nib ak, bi
ned nib okok kau kirop ak dak**

¹¹Mosis God Minim ñu kil tikil, nib nib ginimib agak niñil, Juda bin bi kaj meme kaj sipsip tap okok damil, Lipai wagin God nop tap sobok gep bi okok kirop ñel, kiri pak dagil God nop sobok gi ñöligipal. Kiri nig gil God bin bi ne mideblap, God Bi kisen nib Melkisedek rek ke alap ma ag yokpkop; Lipai bi okok, God nop tap sobok gi ñilig gi nep mideblap. Pen God Bi kisen nib Melkisedek rek alap ag yokak. ¹²Bi God nop tap sobok gep kisen nib nibak apil, bi God nop tap sobok gep ned nib okok kau kirop denigab ak, lo kisen nib ak rek nep apil, lo ned nib ak kau ak dinimiñ.

¹³Pen God Minim dai agesin aul, bi God nop tap sobok gep kisen nib ak, Bi Kib cin ak nep. Lipai bin bi wagin ak tik damil nop ma tik dolak; Bi Kib cin wagin ne ak, bi nokim alap God nop tap sobok gep wög ak ma gak. ¹⁴Juda bin bi wagin ak nep tik damil Bi Kib cin nop tik dolak. Pen Mosis bi Juda wagin ognap God nop tap sobok gep wög ginimel, agil, minim ognap ma agak. ¹⁵Pen Bi God nop tap sobok gep kisen nib nibak, Melkisedek bi God nop tap sobok gep midoligip rek mideb ak me, tap agebin nibaul miseñ yib mideb. ¹⁶Bi jij titi mideb lo alap agek, Bi Kib cin God nop tap sobok gep bi ma mideb. Pen ne Bi kilis ke sek mideb, tap

alap nop ñag pak linimiņ rek ma lip ak me, God nop tap sobok gep bi mideb. ¹⁷Tari ginig: God Minim dai alap ñu kil tikil, God minim ognap Kraiss nop agak ak ñu kil tikil aglak,

“Bi yip sobok gep Melkisedek rek per nep mideniġaban,” agak.

¹⁸Lo God Mosis nop agek Mosis bin bi kirop ag ñak lo nibak, tari ginig gek ak ginimiņ rek ma lak; minim yokop rek lak ak me, God ne di ke okok lak. ¹⁹Lo God Mosis nop agek Mosis bin bi okok kirop ag ñak lo ak, tap timel okok alap di gek, tep rek ma lak. Pen God ne tap tep cinop ñib; tap ned nib ak mer. Nib ak, gos sek midobin. Tap tep kisen nib ak niņ dil, God ne mideb siņak ulep onigabin.

²⁰Bi God nop tap sobok gep ned nib okok wög kiri ned dilak ñin ak, God minim kilis ognap ma agak. Pen Bi Kib cin God nop tap sobok gep bi lak ñin ak, God minim kilis ke agil agak. ²¹Bi Kib cin God nop tap sobok gep bi linig, God minim kilis ke agil agak,

“Yad Bi Kib, yad minim niņid yib agebin; kisen minim alap ke ma agniġain.

Nak per nep yip tap sobok gep bi mideniġan,” agak.

²²God minim kilis agil minim niņid yib agak ak me, cin niņin Jisas kimak ak me, God minim kisen nib tep yib ak di ke okok ma linigab.

²³Bi God nop tap sobok gep ned nib okok, koņai nep rek wög nibak dilak. Alap kimek, bi God nop tap sobok gep kisen nib alap agel, wög nibak gi midoligip; ak kimek kisen nib ak midoligip; ak kimek kisen nib ak midoligip. Nibak me, alap per ma midoligip. ²⁴Pen Jisas nibak rek ma gip; ne per komiņ mideb ak rek, wög nibak ma kirig ginigab. God nop tap sobok gep bi per nep mideniġab. ²⁵Jisas per nep komiņ midek, miņi komiņ mideb, kisen per nep komiņ mideniġab ak me, bin bi God bin bi ne midniġ, Jisas kirop nen agil kimak minim tep ak niņ deniġal ak, ne per nep kirop tig asik yokniמי rek lip.

²⁶Jisas ne Bi siņ yib; ne tap si tap timel sikol sikol ognap ma gip; ne asiņ ma mideb. Jisas kariņ lim ar wagiņ aul bin bi tap si tap timel gipal okok eip midek ak pen God nop di ke dam kariņ lim tep seb kab ar i oklaņ siņak lak. God Nop Tap Sobok Gep Bi Kib Yib cin me ak. Cinop gi ñi tep ginimiņ rek lip. ²⁷Bi God nop tap sobok gep bi kib yib yokop okok, ñin nokim nokim per nep tap si tap timel kiri ke gipal rek, tap pak God nop sobok gi ñil, kisen bin bi ke nib okok tap si tap timel gipal rek, tap pak sobok gi ñibal. Pen Jisas cinop bin bi okok magilsek, tap si tap timel gipin ak niņil, miņek nokim yib mab bak alaņ nop ke God nop sobok gi ñak. Me tep!

²⁸Lo God Mosis nop agek Mosis bin bi okok kirop ag ñak lo ak ageb rek gil, bi tap si tap timel gipal okok kirop ag lel, kiri bi God nop tap sobok gep bi kib yib midebal. Pen kisen ak, God minim ke kilis agil minim

niñid yib agak ak, God Ñi ne ke ag lak. God tap tari tari Ñi ne ginig geb, agil gos niñjak ak, Ñi ne tap magilsek ginimiñ rek lip.

Jisas ne God Nop Tap Sobok Gep Bi Kib Yib cin

8 ¹Pen minim agobin wagin ak nig gil mideb: God Nop Tap Sobok Gep Bi Kib Yib cin ak amil God seb kab ar alañ siñak melik sek mideb ak ñinmagil yipid pis ken ar ne bisig mideb. ²God Nop Tap Sobok Gep Bi Kib Yib cin nibak, ne God sobok gep karip siñak wög gip. God sobok gep karip siñak wög gip ak, bin bi ma gi lilak; God sobok gep karip niñid ak, God Bi Kib ne ke gi lak.

³Bi God nop tap sobok gep bi kib yib lim ar wagin aul okok magilsek, bin bi tap si tap timel gipal okok kaj meme aka kaj sipsip tap okok dap tap sobok gep bi kib yib okok kirop ñel, kiri pen ognap pak God nop tep agil sobok gi ñibal; ognap pen pak tap si tap timel gil gac sek midebal ak God niñil kirig ginimiñ, agil, bid ar ak pak dagil God nop sobok gi ñibal. Nib aknib rek nep, God Nop Tap Sobok Gep Bi Kib Yib cin tap ognap God nop ñiniñ gak. ⁴Jisas karip lim seb kab ar alañ mideb ak me, ne God Nop Tap Sobok Gep Bi Kib Yib mideb. Pen ne karip lim ar wagin aul midobkop, God nop tap sobok gep bi alap ma midobkop. Tari ginig: God agak rek, bi Lipai wagin tik dopal okok nep, God nop tap sobok gep wög gilig gi, Mosis lo minim ñu kil tikak rek niñil, tap pak God nop sobok gi ñibal. ⁵Pen lim dai ar wagin aul God nop tap sobok gep wög gipal ak, kaunan pag niñil gipal rek nep gipal; tap yib ak karip lim seb kab ar alañ siñak mideb. Ar nibak nep, Mosis God sobok gep sel karip ak ginig gak ak, God nop agak, “Nak ñim yirik okok midil yad nep yomen niñnak rek nep, magilsek nib aknib rek nep ginimin,” agak.

⁶God Nop Tap Sobok Gep Bi Kib Yib cin Jisas, bi God nop tap sobok gep bi kib yib ned nib okok göligipal rek ma gip; ne wög kib yib gip. God Nop Tap Sobok Gep Bi Kib Yib cin Jisas gek God bin bi ne ñinagab minim ak, Mosis ñu kil tikak minim ak rek ma mideb. God bin bi ne ñinagab minim ak agniñ, ne minim kilis agil agak, “Yad nibep minim niñid agebin, bin bi yad kirop tap tep yib ñiniñain,” agak.

⁷Pen God minim ned ag lak ak tep gipkop, minim kisen nib ak ma dopkop. ⁸Bin bi okok mid tep ma gilak rek, God kirop ag ginig, bi minim agep ne alap gos ñek, God Minim ñu kil tikil agak,

“Yad Bi Kib nibep agebin,

kisen yad Isrel bin bi okok abe

Juda bin bi okok abe

kirop minim tep kisen nib agniñain.

⁹Napis nased acik okok kirop ñinmagil ar lil

di Ijip nib donek ak

pen minim ag ar nokim lil agnek ak ma niñelak ak me,

- yad kirop kirig ginek.
 Nib ak, minim nibak rek,
 kirop kauyaŋ ma agnigain.
- 10 Yad Bi Kib nibep agebin,
 kisen yad Isrel bin bi okok
 kirop minim kisen nib agil minim ag ar nokim lil,
 lo yad ak gos midmagil nab kirop adañ li ñen,
 niŋ tep gil gos niŋlig gi midenigal.
 Nib ak, yad God kiri midenigain;
 kiri bin bi yad midenigal.
- 11 Ñin nibak, bin bi yad okok,
 nimid nimam bin bi ognap kirop,
 ‘Bi Kib ne God ak niŋ dinimib,’ agil, ma ag ñinigal.
 Tari ginig: bin bi sikol abe, bin bi kib abe,
 kiri magilsek yip niŋnigal.
- 12 Tap si tap timel gipal okok,
 kirop yimig niŋil kirig ginigain.
 Tap si tap timel gipal okok
 gos niŋlig gi midil kirop minim kib ma agnigain,” agak.
- 13 God ne minim tep kisen nib nibaul ag lil, “minim tep kisen nib”
 agak ak me, cin nipin, minim ned nib ak miñi karip wör gip rek wög ma
 mideb, agak; tap wör gip ak ulep pis nep kirig ginig geb.

**God nop tap sobok gep bi ned nib okok, meme
 sipsip lakañ ak dil, God nop sobok gi ñilak**

- 9** ¹ God minim tep ned agak ar ak kisen gil, God nop sobok ginig
 gelak ak, yokop sobok ginimel rek ma lak; kil tep gilig gi nep
 sobok göligipal. God ne agek, sel karip alap gi lil am nop sobok gilak.
- ² Sel karip nibak, karip ñilik migan omal gelak. Karip magil ñilik migan
 alap gi lil, Karip Ñilik Migan Siŋ ak aglak. Ñilik migan nibak sip milaŋ
 dagilep tap alap gi lil, abañ bad alap gi lil, God nop sobok gi ñeb bred ak
 per per dam abañ ar nibak löligipal.
- ³ Pen karip magil ñilik migan alap, walij kib yib ak piñiŋ gilak. Ñilik
 migan nibak, Karip Ñilik Migan Siŋ Ke Yib ak aglak. ⁴ Ñilik migan nibak,
 mab abañ bad alap gi lil, kab gol di pak gol bad lil magilsek karik ñil, tap
 ki tep owip ak ar nibak dagilöligipal. Kes kab gol dil gilak kib alap, God
 Minim Tep Kes Magil agöligipal ak, ak rek nep midek. Kes migan nib
 eyaŋ, God lo minim ñu kil tikak kab omal ak abe, Eron yir dai di tagep
 marip gak ak abe, tap mana tin kab gol dil gilak migan ak tim lelak
 midek ak abe lel midoligip.
- ⁵ God mideb aul, agil, Kes Magil midek ar ar siŋak alaŋ, ejol rek omal
 auan bad sek pis pis gi lilak. Tap si tap timel gipin gac ak, God niŋil kirig

garj, agil, lakañ sikol sikol dap sobok gi ñöligipal nab nibak. Tap nib okok minim ak, miñi ag parsek lil ñu kil tiknim rek ma lip.

⁶Pen tap nib okok magilsek gel midek niñlig gi, bi God nop tap sobok gep okok per per, sel karip ñilik migan sön ar ak amil, God nop wög ak göligipal. ⁷Pen bi God nop tap sobok gep yokop nib okok, karip ñilik magil nab eyañ amnimel rek ma lak. Mi nokim nokim, God nop tap sobok gep bi kib yib ak nep, sipsip lakañ damil nep, ñilik migan nibak amoligip. Tap si tap timel ne ke gak okok gac ak abe, bin bi niñ tep ma gil tap si tap timel gilak okok gac ak abe, God niñil kirig ginimiñ, agil, lakañ ak dam ñilik migan nibak amil, God nop sobok gi ñoligip. ⁸Gak nibak, Kaun Siñ ak cinop yomek nipin, sel karip nibak karip ñilik migan omal sek midoligip rek, Karip Ñilik Migan Komiñ Tep Siñ Ke Yib nibak amnimel rek ma lak. ⁹Pen göligipal nibak, God cinop bin bi miñi midobin ñin aul gos niñnimel, agil agak. Pen tap ñöligipal ak abe, kaj meme kaj sipsip tap okok damil, pak God nop sobok göligipal ak abe, tap si tap timel gel gac midmagil nab kiri adañ midek ak lig gi yokek, God bin bi asiñ ma mideb ne midenimel rek ma lak. ¹⁰Ñig göligipal ak, kiri yokop tap niñeb, ñig niñeb, ñig lig gi yokep, tap ar ar okok nep niñil göligipal. Lo minim ned nib nib okok niñil tap kil tep göligipal nibak, yokop God minim tep kisen nib agniñ gak minim nibak kod midlig gi, kaunan rek niñil gipal rek ak göligipal.

**God nop tap sobok gep bi kisen nib ak, lakañ
ne ak ke dam God nop sobok gi ñak**

¹¹Pen Kraiss gek tap tep bir owip okok, ne ke tap tep okok God Nop Tap Sobok Gep Bi Kib Yib mideb. Pen karip ne siñak bi nab nib cin midil cinop gi ñeb karip nibak, bin bi gi lel sel karip ned nib midoligip rek ma mideb; God lim dai ar wagin aul gi lil, Kraiss wög geb karip ak ma gi lak. Kraiss wög geb karip ak karip tep akniñ ke. ¹²Kraiss kaj meme kaj kau ñilik pakil, lakañ dam God nop sobok göligipal rek ma gak; lakañ ne ak ke yokak ak nep God nop sobok gi ñak. Pen bi God nop tap sobok gep ned nib okok per per nep lakañ soñ gil sobok gi ñöligipal rek ma gak; cinop di God eip jim ñiniñ, lakañ ne ke minek nokim yib dam Karip Ñilik Migan Siñ Ke Yib alañ amnak ak me, cin per per nep komiñ midojin rek lip.

¹³Bin bi lo ned nib niñil tap kil tep göligipal rek ma gil asiñ midelgipal bin bi okok apel, bi God nop tap sobok gep okok, ñin ognap kaj meme alap pak lakañ ak dil, bin bi nib okok kirop yokel pismas gi pakil komiñ loligip; ñin ognap kaj kau anlam alap pak lakañ ak dil, niñ göligipal; ñin ognap kaj kau neb ñilik alap mab dagilel pis nep yin bij tikak bad ognap dil, ñig sek ulik malik gil dil ak rek nep bin bi nib okok kirop yokel pismas gi pakil komiñ loligip. ¹⁴Lakañ yokop pismas gi yokel

komiņ loligip nibak niņil nipin, Kraiș Bi Siņ Ke Yib ak Kaun per per nep mideb ak eip midil, cinop nen agil kimek, lakaņ yokak ak cinop gek, tap si tap timel gipin gac ak midmagil nab cinop adaņ mideb ak lig gi yokek, nag kibiņ ap yap pakil kimnigal ar ak kirig gil, God per komiņ mideb ak nop nep wög gi ñin.

Krais lakaņ ne yokak rek, cinop God eip di jim ñil lak

¹⁵Krais God minim tep kisen nib dapil bi nab nib mideb ak, God bin bi yad dinigain, agil ag lak okok, kirop tap tep ñinigain agak tap okok dinigal, agil geb. Kraiș kimak ak me, bin bi Mosis lo minim ñak ak tib juil, tap si tap timel gipal okok gac nibak lig gi yokniņiņ rek lip.

¹⁶⁻¹⁷Bin bi ognap minim kilis agil agnigal, “Yad kimen, tap yad okok apin rek nonim linimib,” agnigal. Minim nibak yokop nep midek midek, pis nep kimel nep, agnigal rek nonim linigal. Kiri komiņ midel niņlig gi, tap kiri nonim ma linigal. ¹⁸Nib ak rek, God minim tep ned nib Isrel bin bi kirop agak ak, tap alap dap pakel lakaņ yapek kimek me, minim nibak kilis gak.

¹⁹God Mosis nop agek Mosis lo minim mij ñu kil tikak. God minim nibak agek, Mosis niņil minim nibak magilsek bin bi okok magilsek kirop ag ñi dai juil, kaj kau ñilik pak lakaņ dil, kaj meme pak lakaņ dil, ñig ognap sek soņ gil, tap hisop apal lek kid ak dil, sipsip kas ak di dai alaņ nag lil, ñig lakaņ nibak tauil, lo minim mij nibak abe, bin bi apil midelak okok magilsek abe yokek pismas gi pakek agak, ²⁰“Lakaņ yoken mij nibaul abe nibep abe pismas gi pakeb nib aul, God minim tep ak minim kilis agil agip ak, nibi nib aknib rek nep ginimib agip ak, bir nipin, agil, yokebin,” agak. ²¹Pen lakaņ ognap dil, God sobok gep sel karip ak yokek pismas gi pakil, tap tari God nop tap sobok ginig lilak karip nibak midek okok magilsek yokek pismas gi pakil gak. ²²Lo minim Mosis ñu kil tikak nibak uđin li niņil nipin, tap tari God nop tap sobok ginig lilak karip nibak midek okok magilsek rek, ke siņ tep ma midek; lakaņ di yokel pismas gi pakek nep, siņ tep midoligip. Lo minim Mosis ñu kil tikak nibak uđin li niņil nipin, bin bi tap si tap timel gel, tap alap dap pakel lakaņ yapek me, gac nibak lig gi yokoligip.

Krais cinop nen agil kimil, gac cinop lig gi yokip

²³Tap nib okok, tap karip lim seb kab ar alaņ siņak mideb okok kaunan rek niņil gipal rek nep midoligip. Pen tap kaunan rek midoligip okok, sipsip alap lakaņ yapek me, gac nibak lig gi yokak ak me, tap yib ak karip lim seb kab ar alaņ siņak mideb ak, tap yokop nibak rek mer, tap tep ke yib sobok gi ñeb. ²⁴Sel karip ned nib Isrel bin bi gi lil God nop sobok gi ñoligipal ak, tap karip lim seb kab ar alaņ siņak mideb okok kaunan rek niņil gipal rek nep midek. Pen Kraiș karip ñilik migan nibak

rek ma amnak. Ne karip lim seb kab ar alaŋ siŋak amil, miñi cinop bi nab nib rek midil God mideb siŋak eip mideb. ²⁵Isrel God nop tap sobok gep bi kib yib okok, mi nokim nokim, lakañ kiri ke mer, sipsip tap okok pakil lakañ dil, God nop sobok gi ñinig, Karip Ñilik Migan Siŋ Ke Yib ñilik migan ak ameligiŋal. Pen Kraiss ar nibak rek, ñin koŋai nep nop ke sobok gi ñinig karip lim seb kab ar alaŋ siŋak ma amnak. ²⁶Kiri göligiŋal rek, Kraiss abe aknib rek giŋkop ak, God birarik ped okok lim dai aul gi lak ñin ak tikil, mid damil midobin ñin aul, Kraiss per per mi nokim nokim cinop nen agil, yur kib dil kimbkop. Pen miñi ñin kisen nib midobin aul, tap si tap timel gac ak, bin bi ned mideligiŋal okok gilak, bin bi miñi midobin okok gipin, bin bi kisen mideniŋal okok ginigal, tap si tap timel gac ak magilsek, Kraiss ne minek nokim yib bin bi magilsek nen agil karip lim wagin aul apil kimak.

²⁷Bin bi okok magilsek minek nokim yib kimil, kisen minim kib ak niŋniŋal rek, ²⁸Kraiss ne minek nokim nep bin bi tap si tap timel gac kiri magilsek lig gi yokniŋ kimak. Ne bi nokim nep; kiri bin bi koŋai yib. Kraiss kauyaŋ oniŋab. Pen kauyaŋ adik gi oniŋab ñin ak, bin bi tap si tap timel giŋal okok kirop kauyaŋ tap sobok gi ñinim, agil, ma oniŋab; ne niŋ bir pis nep gak. Pen bin bi nop tep gek niŋliŋ gi kod midebal okok kirop pis nep dil tap tep ñiniŋain agak ak ñiniŋ oniŋab.

Tap sobok gep ned nib ak, tap si tap timel gac ak ma lig gi yokniŋab

10 ¹Mosis lo minim ñu kil tikak rek niŋil, sipsip tap okok pak sobok giŋal ak, yokop kisen okok ginig geb ak kaunan pag niŋil giŋal rek giŋal. Giŋal nibak, mi nokim nokim per giŋal. Nib ak, bin bi God nop oniŋ gebal okok, tap sobok gep lo okok kisen gil, God bin bi asiŋ ma mideb ne mideniŋal rek ma lip. ²Sipsip tap okok pak God nop sobok gi ñel, God tap si tap timel gac kiri ak pis nep lig gi yokpkop ak, gos par niŋil, kauyaŋ gin kauyaŋ gin, agil, ma giŋlap; minek nokim alap nep gil kirig giŋlap. ³⁻⁴Kaj kau aŋlam lakañ ak abe, kaj meme lakañ ak abe, tap si tap timel giŋal gac ak lig gi yokniŋ rek ma lip ak me, mi nokim nokim per nep tap okok pak God nop sobok giŋal ak, kiri bin bi tap si tap timel gac sek midebal ak saköl giŋniŋal rek ma lip.

⁵Nib ak, Kraiss lim dai ar wagin aul oniŋ gil, ne God nop agak,

“Bin bi kiri sipsip tap okok pak nep sobok giŋal ak nep tep ma giŋ.

Bin bi tap nep ñeb alap dam nep ñibal ak nep tep ma giŋ.

Pen nak yip bi miŋ goŋ alap gi lipan.

⁶Pen kaj kau kaj sipsip tap nib okok sek dagilel

pis nep yin bij tikip ak abe,

bin bi tap si tap timel giŋal gac ak gos niŋil

sipsip tap okok pak sobok giŋal ak abe,

ak rek nep nak niŋek tep ma giŋ.

7 Pen minim ognap sek agil agnek,
 ‘God, yad midebin.

Birarik nep mij ak ñu kil tikil aglak rek ak,
 yad opin ak, gos nak nep niñil agnigan rek ginigain,’ ” agak.

8 Krajs minim nib omal agak. Minim alap ak God nop agil agak, “Bin bi kiri sipsip tap okok pak nep sobok gipal ak nak niñek tep ma gip; bin bi tap nep ñeb alap dam nep ñibal ak abe nak niñek tep ma gip; kaj kau kaj sipsip tap nib okok sek dagilel pis nep yin sibok yowip ak abe nak niñek tep ma gip; bin bi tap si tap timel gipal gac ak gos niñil sipsip tap okok pak sobok gipal ak, ak rek nep nak niñek tep ma gip,” agak. Mosis lo minim ñu kil tikek mideb rek nep sobok gi ñöligipal ak pen Krajs niñil, “God nop tep ma gip,” agak. 9 Pen Krajs minim alap God nop agil agak, “God, yad midebin. Yad opin ak, gos nak nep niñil agnigan rek ginigain,” agak. Nib ak, bin bi tap pak God nop sobok gi ñöligipal minim ned nib ak, God ne mer agil, minim tep kisen nib ak gek kilis gek amnak. 10 Nib ak, Jisas Krajs ne Nap minim ak niñil, tap si tap timel gipin gac ak lig gi yokniñ, minek nokim yib miñ goñ ne ke pis nep sobok gi ñak ak me, cin bin bi magilsek tap si tap timel gac ak lig gi ke okok yokek bin bi siñ ne midobin.

11 Bi God nop tap sobok gep okok ñin nokim nokim wög kiri gipal. Ñin nokim nokim kiri per per tap okok pak God nop sobok gipal. Pen nig gel, bin bi tap si tap timel gipal gac ak lig gi yokniñ rek ma lip.

12 Pen Krajs bin bi tap si tap timel gac ak lig gi yoknim, agil, ne ke minek nokim alap nep sobok gi ñil, wög nibak gi dipin, agil, am God ñinmagil yipid pis ke ar ne siñak bisigak. 13 Krajs God ñinmagil yipid ar pis kid bisig midek niñlig gi, God ne Krajs nop kausal maual midebal okok tob arak ne mok okok linigab.

14 Krajs ne minek nokim alap nep kimak ak me, bin bi tap si tap timel gac kiri lig gi yokip okok, kiri bin bi siñ ne bir midebal. Pen kiri bin bi siñ ne per nep mideniñal. 15 Kaun Siñ ak rek nep cinop minim nibak rek ag ñib. Ne minim agep bi ne alap nop gos ñek, God Minim ak dai alap ñu kil tikil agak,

16 “Yad Bi Kib agebin,
 kisen yad minim kisen nib kirop agil minim ag ar nokim lil,
 lo yad ak gos midmagil nab kirop adañ li ñen,
 niñ tep gil gos niñlig gi mideniñal,” agak.

17 Pen minim alap agak,
 “Tap si tap timel gipal ak niñil kirig gil,
 kisen gos niñlig gi ma mideniñain,” agak.

18 Nib ak cin nipin, God ne bin bi magilsek tap si tap timel gipal gac ak niñil bir kirig gip rek, God nop tap sobok gep bi okok wög alap ma mideb yib.

God mideb maŋ siŋak amnin

¹⁹⁻²⁰ Ai mam sikop. Jisas miŋ goŋ ne ke lakañ ne ke nep sobok gi ñil yur dil kimak ak me, waliŋ kib Karip Ñilik Miŋan Siŋ Ke Yib piliŋ gilak ak pig gi rik gek, kijonŋ kisen nib kijonŋ komiŋ ameb alap cinop pis nep yikak.

²¹ Kraiŋ ne cin God wagiŋ ne midobiŋ okok, bi karip nap nib rek midil, God Nop Tap Sobok Gep Bi Kib Yib cin ak mideb. ²² Nib ak me, Kraiŋ tap si tap timel giŋin gac ak bir lig gi yokek, gos magil cin mid tep giŋ niŋil, cin ñig pak tep gil, siŋ nep midil, God miniŋ tep ak niŋ di kilis gil, gos nokim nep niŋil, God mideb maŋ siŋak amnin. ²³ God per nep agiŋ rek nep giŋigab ak me, God cinop dam karip lim seb kab ar alaŋ siŋak dad amniŋag agiŋ miniŋ niŋid nibak niŋ di kilis gil gos sek kod midon. God kisen nig giŋigab miniŋ ak bin bi okok ag ñibiŋ rek, cin ke gos nokim nibak nep niŋ di kilis gil giŋ midon. ²⁴ Pen ai mam sikop ognap kirop midmagil lil gi tep gon, kiri pen bin bi ognap kirop midmagil lil gi tep gel, ai mam okok pen pen di tep gil, gi ñil, pen pen midmagil lil, gi tep giŋ. Gos ak nep niŋlig giŋ midon. ²⁵ Bin bi ognap God Miniŋ niŋin, agil, apil mogiŋ giŋal ak pen kisen kirig giŋal rek, ma giŋ. Bi Kib adik gi apil miniŋ kib agniŋag ñin ak ulep mideb, agil, ap mogiŋ gil, miniŋ tep niŋin ak, pen pen ag ñilig gi, jim ñil midon.

Kraiŋ nop kirig genigabiŋ ak, pis nep ap yap pakjin rek lip

²⁶ Kraiŋ miniŋ tep miniŋ yiŋil ak agel niŋ tep gil, pen adik gil tap si tap timel ar ak kauyaŋ giŋig giŋ midoniŋabiŋ ak, tap alap God nop sobok gi ñon gac cinop ak lig gi yokniŋiŋ rek ma lip. ²⁷ Ar nibak, kanib cin alap ma mideniŋag. God nop piriŋil, miniŋ kib ak abe, mab miŋaŋ kib God kauŋ mauŋ ne okok kirop yin sibok yoniŋag ak abe kod mideniŋabiŋ. ²⁸ Mosis lo miniŋ ñu kil tikak ak, bin bi niŋel, tap yokop rek lek, tib juetak ak, bin bi omal aka omal nokim uŋin niŋel, miniŋ kib agoliŋgiŋal ñin ak, kirop yimiŋ niŋniŋiŋ rek ma lek, bi miniŋ tig bilokep okok miniŋ nibak niŋ tep gil agel pis nep ñag pak loliŋgiŋal. ²⁹ Nib ak, bin bi God Ñi ne ak nep aleb aleb ñeniŋal ak, God bin bi miniŋ kib agniŋag ñin ak kirop miniŋ kib agil, kirop pen yur timel ñiniŋag. God Ñi ne nop aleb aleb ñeniŋal nibak, Kraiŋ lakañ ne ke cinop God eip di jim ñil liniŋ agil yokak ak, kirop tap yokop rek lek, nig giŋigal. Pen God Kaun kirop yimiŋ niŋip ak, nop ak rek nep aleb aleb ñiniŋal. ³⁰ Cin niŋin God Bi Kib ne agak, “Bin bi tap si tap timel giŋal okok, yad nokim kirop pen giŋ timel giŋigain,” agak. Pen miniŋ alap agak, “Bi Kib ne ke bin bi ne okok kirop miniŋ kib agniŋag,” agak. ³¹ Pen God Bi Kib per per mideb ak, bin bi okok kirop miniŋ kib agniŋag ak niŋel jel gek piriŋniŋal.

God Miniŋ ageb rek nep gon amnaŋ

³² Pen ned goliŋgiŋim ak saköl ma giŋimiŋ. Kraiŋ melik tep niŋep pak ñek miniŋ tep ne ak niŋ dem, bin bi ognap niŋep miŋer kib ñilak ak

pen nop ma kirig gipek. ³³Nin ognap nibep minim timel agil, gi timel göligipal ak pen gos nibak ma niñil, Kraiss bin bi migan ognap kirop gi timel gelak nib okok ken ameligiipim. ³⁴Bin bi Kraiss minim tep ak niñ del, miñ lilak bin bi okok, kirop yimig niñöligipim. Bi kib karip lim nibi kod midebal okok apil tap nibep magilsek di okok nib okok nib pili gi dad amel, nibi pen gos par ma niñil, tep gek niñlig gi, tap pili gi ma dad ameb, tap tep yib per per nep mideniğab tap nibak nep gos niñlig gi nep mideliğipim. ³⁵Nib ak, nibi sisain ma ginimib; kilis gil gos sek mideniğabim ak, God nibep pen tap tep yib niñiğab. ³⁶Kraiss minim tep niñ dipim ak ma kirig ginimib. God Minim ageb rek nep gem amek me, God Minim ageb rek nep nibep tap tep nibak niñiğab. ³⁷God Minim ak niñil niñin, minim alap nu kil tikil aglak,

“Won ulep nep alap mideb

Bi onig geb ak onigab.

³⁸Pen bin bi komiñ tep yad okok,
yip niñ dil komiñ mideniğal.

Pen bin bi ognap yip kirig geniğal ak,
yip tep ma ginigab,” aglak.

³⁹Pen cin bin bi God nop kirig gil ap yap pakniğal ognap ma midobin; bin bi nop niñ dil, per per nep komiñ mideniğal okok midobin.

Niñ dep won ak

11 ¹Bin bi God Minim ageb ak minim niñid ageb, agil, God nop niñ dipal okok, God Minim kisen nibep gi tep ginigain ageb ak, nibi gos omal mer, God Minim ageb rek nep niñ di kilis gipal. Bin bi God Minim tari ageb ak minim niñid nep ageb, agil, God nop niñ dipal bin bi okok, God Minim tap nib okok nig gil nig gil mideb ageb ak, kiri tap nib okok udin ma nipal ak pen kiri gos omal mer, God Minim ageb rek nep niñ di kilis gipal. ²Bin bi ognap birarik nep okok, miñi nep nu kil tikebin rek gilak rek, God nop tep gak.

³Cin God nop niñ dil, God Minim ageb ak minim niñid ageb apin ak me, tap seb kab ar alañ abe, tap lim dai ar wagiñ aul abe, God tap alap dil ma gi lak, God minim ak nep agek misen lak ak, niñin.

Ebol, Inok, Noa God nop niñ dilak

⁴Birarik nep bi nak Ebol God nop niñ dil, God minim tari ageb ak minim niñid nep ageb agak ak me, tap dapil God nop pak sobok gi ñek, God niñek tep gak. Pen nimam Ken tap dapil sobok gi ñak ak, God niñek tep ma gak.

Ebol ne God nop niñ dil, God minim tari ageb ak minim niñid nep ageb agak ak me, God nop pen, bi komiñ tep yad, agil, tap sobok gi ñak ak niñil, yip tep giğ agak. Ebol kimil amek, miñi eip ma midobin ak pen,

ne God nop niŋ dek kesim nibak, cinop bin bi ognap gos ñilig gi nep mideb.

⁵Pen Inok ne ak rek nep God nop niŋ dil, God minim tari ageb ak minim niŋid nep ageb, agil, God nop niŋ di mid damil ma kimak. Ne God nop niŋ dil, God minim tari ageb ak minim niŋid nep ageb agak ak me, God nop pen, bi komiŋ tep yad, agil, komiŋ nep dad amnak. Bin bi nop piyo piyo niŋ mer niŋlak; God ne ke nop dad kariŋ lim seb kab ar alaŋ siŋak ugai dad amnak. ⁶Bin bi God nop niŋ dil, God Minim tari ageb ak minim niŋid nep ageb agnigal okok nep, God niŋek tep ginigab. Tari ginig: ne komiŋ mideb rek, nop sobok gon, cinop minim ageb rek ginigab apal bin bi okok nep di tep ginigab.

⁷Pen Noa ne ak rek nep God nop niŋ dil, God minim tari ageb ak minim niŋid nep ageb, agil, God agip rek nep ginigab, agil, agak rek nep gak. God Noa nop miñab kib pakniŋab agek, Noa uŋin ma niŋak ak pen God nop niŋ dak rek, minim niŋid agip, agil, ñig magöb kib ak gi lak. Ñig magöb kib nibak gi lil, bin ne ñi pai ne okok magilsek eip ñilik miŋan nibak amel, miñab kib yib ak pakak pen komiŋ midelak. Pen God miñab kib pakniŋab agek, uŋin ma niŋak ñin ak, God minim tari ageb ak minim niŋid nep ageb, agil, gek amek ñig magöb gi lak ak me, God nop bi komiŋ tep yad agak. Ne komiŋ amek niŋlig gi, bin bi minim nop tib julak okok bin bi tap si tap timel nep gilig gi midelak ak misenŋ mideb.

⁸Based acik Ebrahim ak rek nep God nop niŋ dil, God minim tari ageb ak minim niŋid nep ageb, agil, agak rek nep gak. Nap kariŋ lim ak midek niŋlig gi God agak, “Ñi pai nak tik donigan tik dapel amniŋab okok, nibep kariŋ lim kib alap pis nep agnigain ak me, amil nib okok midenimin,” agak. God nib agek, Ebrahim God agak kariŋ lim nibak mideb okok, agil, ma niŋak; God yip kod mideniŋab, agil, abramek amnak. ⁹Pen God kariŋ lim nop ag lak am midek kariŋ lim nibak kariŋ lim ne mer, bin bi ognap kariŋ lim kiri. Ne bi par okok nib rek midek. Ne nig gil midil, sel kariŋ nep gil kin ajil, ñi ne Aisak nop tik dowak. Tik dapek kib gil, nap gak rek nep sel kariŋ nep kin ajek. Aisak ñi ne Jekop nop tik dapek kib gil, ak rek nep sel kariŋ nep kin ajek. Pen God kariŋ lim nop ag lil Ebrahim nop agak ak, ñi ne Aisak Jekop kirop ak rek nep ag lak. ¹⁰Pen Ebrahim, God kariŋ lim kilis tep per mideniŋab, agil, gi lak ak, am mideniŋain, agil, gos niŋlig gi midek.

¹¹Ebrahim bi milep lil, bine Sara bin waske milep yib lil, miderek. Pen Ebrahim God nop niŋ dil, God minim tari ageb ak minim niŋid nep ageb, agil, agip rek nep cirop ginigab, agil, ñi Aisak nop tik dorek. ¹²Ebrahim bi bir kimeb rek midek ak pen ñi ne nibak tikek, tik dam dapil gel, cin bin bi koŋai yib nep, gap seb kab alaŋ siŋak koŋai yib nep mideb rek, kab kilip airan ñig gol siŋak koŋai yib nep mideb rek, wök pag ma nipal rek ak, midobin.

¹³Bi birarik nep agebin nib okok, God nop niņ dil, God minim tari ageb ak minim niņid nep ageb, agil, agip rek nep cinop ginigab, agil, kimlak. God kirop tari tari agek, agip rek nep cinop ginigab, agil, nop niņ di midelak ak pen God agak nibak gek niņil ma kimlak. God kirop tari tari agak ak, udin ma niņil, par okok nib rek gos kiri nep niņil, kisen God tap tep cinop ñinigab agak ak cinop ñinigab, agil, tep gek niņlig gi mid damil kimlak. Lim dai ar wagin aul midil agöligipal, “Cin bin bi ke okok nib yokop apil lim dai ar wagin aul midobin,” agöligipal. ¹⁴Bin bi minim nibak rek apal okok, karip lim cin yipid gil alap mideb ak, ag gos ak niņil, nib apal. ¹⁵Karip lim kiri kirig gil olak ak gos amek, adik gi amblap pen adik gi ma amnilak. ¹⁶Pen gos kib kiri amnak God karip lim tep seb kab ar alaņ sįak. God ne pen kirop karip lim alap gi li tep gip ak me, cin nipin God kirop bin bi yad agek nabiņ ma gip.

¹⁷⁻¹⁹Pen God, Ebrahim agnigain rek ginigab aka, agil, nop agak, “Ñi nak Aisak, “Tikek tikel tik dam dapil gel koņai midenigal,” agnek ñi ak nep, nop dam ñag pak lil, yip sobok gi ñinimin,” agak. Agek, Ebrahim God nop niņ dil, God minim tari ageb ak minim niņid nep ageb, agil, yip agip rek nep ginigab, agil agak, “Ñi yad nibak tikek tikel tik dam dapil gel koņai midenigal agak minim ak, God ne ma kirig ginigab; ñi yad nokim yib ak ñag pak len, ne gek kauyaņ wariknigab,” agil, ñi ne Aisak nop dam bid ar ak nag ñon gi lil, tu dil piņil linig gek, God agak, nig ma ginimin agak. Nib ak, ñi ne Aisak nop bir pis nep kimak rek lak ak pen nop komiņ dil dad adik gi amnak.

²⁰Aisak pen kib gil ñi omal tik dowak. Ñi alap yib ne ak Jekop; ñi alap yib ne ak Iso. Pen nap Aisak ak rek nep God nop niņ dil, God minim tari ageb ak minim niņid nep ageb, agil, bi milep yib lil, God agip rek nep ginigab, agil, ñi ne omal kirop tap tep kisen ginigab minim ak ognap ned ag ñak. Kimek, kisen agak rek nep gak.

²¹Pen ñi ne Jekop ak rek nep God nop niņ dil, God minim tari ageb ak minim niņid nep ageb, agil, agip rek nep ginigab, agil, bi milep yib lil maņ kimnig gek ñin ak, yir dai di tagep ne ak dil, God yib nop agek ar amek niņlig gi, ñi ne Josep ñi tikak omal ak kirop agil, God kirop mal di tep gil kod mid tep ginimiņ, agak.

²²Pen ñi ne Josep ak rek nep God nop niņ dil, God minim tari ageb ak minim niņid nep ageb, agil, agip rek nep ginigab, agil, bi milep yib lil maņ kimnig gek ñin ak, Isrel bin bi ne okok kirop agak, “Kisen karip lim Ijip aul kirig gil, adik gi karip lim Kenan amnigabim. Nın nibak, tiņil yip okok sek damil nib nib ginimib,” agak. Agil kimek, kisen kiri agak rek nep gilak.

Mosis nop tik dapil we girek

²³Mosis nonim nap ber mal ak rek nep God nop niņ dil, God minim tari ageb ak minim niņid nep ageb, agil, agip rek nep ginigab, agil, ñi

Mosis nop tik dapil, kil tep midek ak niñil, takin omal nokim we gi ñer midek. Ijip Kiñ Pero nop ma pirikrek. ²⁴Mosis kib gil, ne ak rek nep God nop niñ dil, God minim tari ageb ak minim niñid nep ageb, agil, agip rek nep ginigab, agil agak, “Yip Pero pai ne ñi ne ma agnimel. ²⁵⁻²⁶Lim dai ar wagin aul tap si tap timel gilig gi miden, yip tep ma ginigab; per per midenim, agil, Mesaia nop niñ den, yip ag junigal ak tep; pen Ijip bin bi ameb owep tap tep kiri okok yip tep ma gip agak. Yad bin bi God pis ken midel, kirop gi timel gipal okok eip mogim gil midenim,” agak.

²⁷Pen Mosis ne God uñin ma niñep ak nop niñ dil, misen niñip rek lek, kiñ Pero nop milik kal niñak ak, ma pirikak. God nop niñ dil, God minim tari ageb ak minim niñid nep ageb, agil, agip rek nep yip kod midenigab, agil, God agak rek nep gil, Isrel bin bi kirop poñ dil karip lim Ijip kirig gil owak. ²⁸Pen Mosis ne God nop niñ dil, God minim tari ageb ak minim niñid nep ageb, agil, agip rek nep cinop ginigab, agil agek, Isrel bin bi Pasopa sipsip ñilik okok pakil, lakañ dil kijon wagin pis pis yokel pismas gi pakek, dai ar alañ abe yokel pismas gi pakek, ejol apil Ijip bin bi ñi ned tik dolak okok magilsek ñag pak lilig gi, Isrel bin bi karip kiri ak amil ñi ned kiri okok ñag pak ma lak.

²⁹Isrel bin bi God nop niñ dil, God minim tari ageb ak minim niñid nep ageb, agil, agip rek nep cinop ginigab, agel, Ijip kai kirop yik gel, kiri pen amil ñig solwara Sapai ak junig gel niñlig gi, God gek ñig nibak lilig gi pis pis amek, lim milep ar ak rek amil, pis kidadañ amnilak. Pen Ijip kai kirop yik gi dam nab nibak apelak, ñig apil kirop karik yipil yokek magilsek ñig ñibil kim saklak.

³⁰Pen kisen Isrel bin bi God nop niñ dil, God minim tari ageb ak minim niñid nep ageb, agil, agip rek nep ginigab, agil, amil taun kib Jeriko kab wari kilis ak ñin aknib ar oñid ak kis kis gel gel, kab wari ak pis nep yap pakak.

³¹Bi si dep bin Rehap ak, God nop niñ dil, God minim tari ageb ak minim niñid nep ageb, agil, bin bi ne God minim ne kirig gilak okok eip ma kimak. Tari ginig: Isrel bi omal taun kib Jeriko amer, kirop mal ñag pak linig gelak, pen God Rehap nop agek, karip lim cin niñ linig opir, agil, di kasin gek, komiñ midil adik gi amnirek.

³²Pen bin bi God nop niñ dil, God minim tari ageb ak minim niñid nep ageb agelak, God ne kirop ke yib gak kesim okok titi gil agen parsek amniñab? Bi nak Gidion, Barak, Samson, Jepta, Depid, Samyuel bi okok abe, bi God minim agep okok abe gilak gilak rek agen, minim par kib amniñab. ³³Bin bi nib okok God nop niñ dil, God minim tari ageb ak minim niñid nep ageb, agil, ognap bin bi karip lim ke tigon ognap kirop yik gi yoklak. Kiri gi tep gilak rek, God ginigain agak rek nep kirop gak. Ognap kirop kain sapeb layon midelak nab siñak di yoklak ak pen God kirop kod midek ma sulak. ³⁴Pen ognap mab kib yinek nab siñak di

yoklak ak pen kirop ma yinak. Ognap tu par kid dil kirop piñil lin aglak ak pen pirik gi komiñ amnilak. Bin bi ognap bin bi sain ak pen God kirop kod midek kal kilis yib midelak. Kiri pen pen gilig gi, amil ami bi karip lim ke nib okok kirop yik gi yoklak. ³⁵Bin ognap nigmil sikop ñi pai kiri okok kimelak, God nop niñ dil sobok gel, ne gek kauyañ wariklak.

Bin bi ognap God nop niñ delak rek, kirop yur ñilak. God nop kirig giplap, kirop wisib yokel komiñ amblap ak pen, cin kimon God cinop gek warikil karip lim tep ne siñak per per mid tep gin, agil, God nop cig gilig gi nep midil nop ma kirig gel, kirop tapin gi timel gil yur mab ñel ñel kimlak. ³⁶Ognap kirop ag juil, yir di tapin paklak. Ognap sen ñon gil dam miñ yoklak. ³⁷Ognap kab ju pak lel kimlak. Ognap kirop so dil nab siñak tib gi rik gi dai dai lilak. Ognap tu par kid dil, kirop pis nep piñil lilak. Ognap kirop per nep gi timel gil, yik gel gel koslam yib midil, bin bi yim gep rek midil, kaj meme sipsip wak dil walij rek yimil gi ajöligipal. ³⁸Pen bin bi okok bin bi tep yib; bin bi timel okok nab kirop siñak ma mideblap. Cin eip midep rek ma lip, agil, kirop gi timel gel gel, pirik gi amil miñ mab kab nep mideb nab okok midil, kab migan lim migan okok kin tagöligipal.

³⁹Bin bi agebin nib okok, God nop niñ dil, God minim tari ageb ak minim niñid nep ageb, agil, agip rek nep ginigab, ageb, God kirop magilsek, gi tep yib gil bin bi komiñ tep yad midebim, agak. Pen God kirop tap tep ñinigain agak ak, tap tep ak ñin nibak ma dilak. ⁴⁰Tari ginig: God cinop tap tep yib ñinigain, agil, gos niñak rek, ñin kisen nokim nibak nep, kiri bin bi okok abe, cinop bin bi abe cinop magilsek dil gek, kabsek am jim ñil bin bi siñ ne midenigabin.

12 ¹Pen bin bi koñai nep agesin nib okok cinop piñil kis kis gilig gi midebal rek, tap gos kib nipin okok kirig gil, tap si tap timel cinop kasek cig ginimiñ rek lip ak kirig gil, kilis gil God kanib cinop ag lip ak pig gi rikid ag amil amnin. ²Jisas agak rek, cin God nop niñ dil, God minim tari ageb ak minim niñid nep ageb, agil, kisen God minim ageb ak magilsek miseñ nep niñ tep ginigabin. Jisas nop mab kros bak alañ ñag pak liniñ gel, yip bi timel rek ñag pak lel nabiñ dinigain, agil ma agak. Kisen karip lim seb kab ar i oklañ siñak miñ miñ yib ginigain, agil, cinop bin bi nen agil kimil, warik am God ñinmagil yipid pis ken ar ne siñak bisigak. Nib ak, per per nep Jisas nop nep gos niñlig gi midon.

³Bin bi koñai nep Jisas nop milik kal niñil gi timel gil gel amek, ne ma pirikak ak me gos niñnimib. Nibi Jisas gak ar nibak gos niñil, niñ akniñ rek nep gil, gos sek midil, God ageb rek nep gilig gi midenimib. ⁴Jisas ne Seten eip pen pen gak ak, bi okok nop mab bak alañ ñag pak lel kimak. Nibi pen, Seten nibep tap si tap timel ginig lip gek, nig ma gin, agil, nop eip pen pen gipim ak, nibep ma ñag pak lipal. ⁵God nibep ñi pai yad, agil, minim tep agek God Minim ak ñu kil tiklak ak saköl gipim aka? Ne agak,

“Ñi pai yad siñ aul!

Bi Kib ak nibep timid uknig miker ñinigab ak,
gos kib ma niñnimib.

Bi Kib nibep ag ginigab ak,
cinop pis nep kirig gip, agil,
gos par ma niñnimib.

6 Bi Kib bin bi midmagil lip okok kirop timid uknigab.

Ñi pai ne okok me, kirop magilsek miker ñinigab,” agak.

7Ñib ak, koslam midenigabim ak, gos par ma niñnimib; God cinop timid ukeb, agil, gos sek midenimib. Nibi nipim, nap sikop okok ñi pai kiri okok magilsek timid ukpal. 8God ne ñi pai ne magilsek timid ukip. God nibep timid ma uknigab ak, nibi ñi pai ne mer, ñi pai nap sek ma midebim ak me, nibep timid ma uknigab. 9Bapi cin lim dai ar wagin aul midebal okok cinop timid ukel, tep ukpal ak, agil nipin. Nib ak rek, Bapi cin seb kab ar alañ mideb ak cinop timid ukek, tep yib nig gip, ag niñil, komiñ midon.

10Bapi cin lim dai ar wagin aul timid ukpal okok, ñi pai sikol midobin won sikol ak nep, gos kiri ke niñil cinop timid ukpal. Pen God cinop nen agil, siñ midebin rek nep midelañ, agil, cinop timid ukip. 11God cinop timid ukeb won ak tep ma gip ak pen timid ukek, nag tep ar nibak niñil, kapkap midil gi tep gilig gi nep midonigabin.

God tap ne okok nep gos niñlig gi midenimib

12Ñib ak me, ñin tob kalau gek owip ak, yokop gip, agil, warik amil apil gem kilis ginimiñ. 13Kanib yipid gil tep tep ar ak amem, tap ognap tob gol nibep okok pig juonimiñ, kilis gil amem amem yim ñek komiñ linigab.

14Bin bi okok eip magilsek kapkap jim ñil midon, agil midenimib ak pen God bin bi siñ ne midenimib. God bin bi siñ ne okok nep Bi Kib nop niññigal.

15Nibi niñ tep gil, God cinop yimig niñil di tep gip ak ma kirig ginimib. Niñ tep ginimib, nab nibi okok bin alap bi alap gos timel niñil, bin bi ognap gos timel nibak agenigab ak, kiri pen ak rek nep gel gel, bin bi konjai nep kirop asiñ nibak ulikniñiñ rek lip. 16Niñ tep gil, nab nibi okok bin alap bi alap bin si bi si ma ginimiñ. Nibi magilsek God tap ne okok nep gos niñlig gi midenimib. Iso birarik nep gak rek ma ginimib. Iso ne God tap ne okok gos ma niñil, yuan gek, tap ñiñin, agil, God nap Aisak tap tep ñak ak, Aisak ñi ne ned ak Iso nop ñinig gak ak, Iso ñi ned midil dipkop ak, pen tap tep nibak tap yokop rek lek ne kirig gil, tap magil ak nep dak. 17Pen nibi nipim, nap Aisak tap tep ñi ned Iso nop ñinig gek tap tep nibak, Iso ma dak ak me, kisen mapin gek sil aglig gi, kauyañ dinim, agil, kanib dinimiñ alap ma midek, mapin yib gek sil aglig gi midek.

God per komiņ midēb ak karip lim ne ak opim

¹⁸ Isrel bin bi karip lim Sainai Dim midēb ak amil dim nibak wagin siņak apel, mab kib yib yinil, kislīm yib apil, yigen kib dil gek, udin kiri ke niņlak. Pen nibi karip lim nibak rek ma opim. ¹⁹ Akil magil minim kib ak agil, minim seb kab ar alaņ nib alap agek, bin bi okok pirikil Mosis nop aglak, “Ake! Minim ageb nibak rek, minim ognap agek ma niņin,” aglak. ²⁰ Tari ginig: God minim ned ag lak ak Isrel bin bi okok ag niņig gi Mosis nop agak, “Bin bi, kaj meme, kaj sipsip tap okok dim nibaul apenimel, kab ju pis nep pak linimib,” agak. Minim nibak niņel midmagil kirop pis nep kir gak. ²¹ Tap gak nibak niņil piriklak ak, Mosis ak rek nep niņil agak, “Yad jep jep dil prikebin,” agak.

²² Nibi pen Sainai Dim nibak ma opim; nibi Saion Dim opim. Saion Dim opim ak, God per komiņ midēb ak karip lim ne ak opim, karip lim Jerusalem seb kab ar alaņ, ejol koņai yib nep miņ miņ gilig gi midēbal siņak, karip lim nibak opim.

²³ Bin bi Kraīs minim tep ak niņ del, God kirop ni ned rek dil, ni pai yad, agil, yib kirop karip lim ne seb kab ar alaņ siņak nu kil tikip; kiri mogim gil miņ miņ gilig gi midēbal siņak, nibi karip lim nibak amil, Kraīs nop niņ dipal okok eip jim nil midēbim. Kraīs nop niņ dipim ak me, God bin bi okok magilsek minim kib agniğab God ak eip jim nil midēbim. Bin bi karip lim ar wagin aul midil, God nop niņ dil, God Minim ageb rek gil, bin bi komiņ tep ne midil kimil, kaun kiri amil, God eip bin bi siņ ne midēbal bin bi okok eip jim nil midēbim. ²⁴ Jisas ne God minim tep kisen nib dapil bi nab nib midēb ak nop nep opim. Ken nimam Ebol nop nağ pak lek lakaņ yowak ak, minim kib yib dak; pen Jisas cinop nen agil kimek lakaņ ne yowak rek, God eip jim nil midojin rek lip.

Niņ tep ginimib

²⁵ Nib ak, niņ tep ginimib. Bin bi Sainai Dim wagin siņak midil, God minim agak ak ma dilak okok, komiņ amnimel rek ma lak rek ak, God karip lim seb kab ar alaņ siņak nib minim tep kisen nib ak agak ak kirig geniğabin ak, cin ak rek nep komiņ amjin rek ma liniğab.

²⁶ Niņ ned nibak God kirop minim agek niņlig gi, monmon rek dak. Pen cinop agak, “Kisen akniğ rek kauyaņ gen, lim dai wagin aul abe, seb kab ar alaņ abe magilsek kikaun giniğab,” agak. ²⁷ God minim magil “Kauyaņ” agak nibak niņil niņin, tap per ma mideniğab agil gi lak okok magilsek kir giniğab; tap per per mideniğab agak tap okok nep mideniğab. ²⁸ Nib ak, cin karip lim kikaun ma gep, karip lim per per nep kilis midēp, karip lim tep yib amniğabin rek, tep agliğ gi midil, God nop niņ di kilis gil, Bi kilis ke sek midēb ak gos niņlig gi, yib ne agon ar amnaņ. ²⁹ God cin mab ke yineb rek midēb.

Ai mam ognap kirop midmagil yib lin

13 ¹Krais bin bi okok eip ai mam rek pen pen midmagil lilig gi nep midenimib. ²Krais bin bi okok nib nibep pis ken apenimel, kirop di tep ginimib. Bin bi ognap, bin bi okok nib apel, bin bi yokop okok nib apebal, agil, ag wasu dil, bin bi mer, ejol ognap kirop ag wasu dipal. ³Krais bin bi ognap miñ midenimel, cin eip miñ midobin ag gos niñil kirop gi tep ginimib. Krais bin bi ognap koslam midenimel, cin eip koslam midobin ag gos niñil kirop gi tep ginimib.

⁴Ber mal dil, gi tep gipir. Kirop ber mal gi timel ma ginimel. Pen ber mal dil, kisen bin si bi si ginigair okok abe, bi praj bin praj bin si bi si ginigal okok abe, God kirop minim kib yib agnigab.

⁵Tap cin dipin okok sikol gip, agil, agon kilnok kibap gol mani tap okok gos kib ak ma niñnimib. Tap sikol cin mideb ak tep mideb, agil gos nibak nep niñnimib. God agak,

“Nibep ma kirig ginigain;

nibep eip per per nep midenigain,” agak.

⁶Nib ak, gos sek midil agin,

“Bi Kib yip kod mideb rek, ma piriknigain.

Bin bi ognap yip gi timel ginimel rek ma lip,” agin.

⁷Bi kib kiri nibep God Minim tep agel nipek ak gos niñlig gi midenimib. Kiri God nop niñ dil, minim ne ageb rek gel amek kimlak ak gos niñlig gi midil, nig aknib rek nep gilig gi midenimib. ⁸Jisas Krais ned midoligip rek, miñi nib aknib rek nep mideb; pen miñi mideb rek, kisen per per nep nib aknib rek nep midenigab. ⁹Bin bi ognap nibep minim esek ke ke agenimel ak niñil ma dinimib. God nibep yimig niñil, di tep gil, kod mid tep gip ak nep gos niñil, midmagil nab nibi adañ kilis dil, gos sek midenimib. Pen tap niñeb lo okok gos alap ma niñnimib. Bin bi tap niñeb lo okok kisen gil mid tep ma ginigal. ¹⁰God nop tap sobok gep bi okok, God sobok gep karip ak midil tap pak bid ar siñak God nop sobok gipal bi okok, tap bid cin ar mideb ak niñnimel rek ma lip. ¹¹God nop tap sobok gep bi okok kaj kau kaj meme pakil lakañ ak dam God nop tap sobok gep bi kib yib ak nop ñel, ne pen bin bi tap si tap timel gipal, agil, God nop sobok ginig, dam Karip Ñilik Miñan Siñ Ke Yib ak soñ gip. Nonim ak pen dam, midebal soñ ar siñak dagilel pis nep yin sibok ñib amib.

¹²Nib ak rek, Jisas bin bi tap si tap timel gipal gac nibak lakañ yad ke lig gi yoknim, agil, taun kib Jerusalem kijon soñ ar siñak amil, yur kib dil, lakañ yapek kimak. ¹³Nib ak, cin Jisas nop kisen gil, bin bi yokop okok gel amib nag ar ak kirig gil, soñ ar ak amon, nop ag julak rek cinop ak rek nep ag junimel. ¹⁴Tari ginig: lim dai ar wagin aul per per midojin kau alap ma mideb ak pen kisen karip lim seb kab ar alañ siñak amil per per midojin, agil, kod midobin.

¹⁵Nib ak, cin per per nep, Jisas Bi Kib cin, agil, yib ne agon ar amnaḡ. Niḡ gon, God uḡin yirik ne tap sobok gep tep rek linigab. ¹⁶Bin bi ognap okok kirop di tep gil, gi tep gil, tap cin ognap kirop nonim li ñin. Niḡ gon, God niḡil tap sobok gep tep rek lek, miñ miñ ginigab.

¹⁷Bi kib nibep kod midebal okok, minim kirop dil, agnimel rek ginimib. God wög gipin ak God niḡek tep ginimiḡ, agil gos ak niḡlig gi nibep per nep niḡ tep gil kod mid tep gipal. Nib ak, kiri tap tari ginimib agnigal ak, ak rek nep ginimib. Niḡ geniḡabim ak, tep gek niḡlig gi wög kiri ginigal. Pen agnigal rek ma ginigabim ak, wög ginig ginigal ak ginigal ak pen tep gek niḡlig gi ma ginigal. Niḡ gel, nibep kod mid tep ginimel rek ma linigab.

Nibi God nop sobok gem, ne cinop kod midonimiḡ

¹⁸Pen nibi God nop sobok gem ne cinop kod midonimiḡ. Cin gos omal mer, gos nokim nep niḡil, tap tari ginigabin, God Minim ageb rek nep gilig gi midon, agil gos ar ak nep nipin. ¹⁹Yad tap kib alap kilis gil nibep ag niḡebin: God nop sobok gem, ne gek, nibi midebim siḡak kasek ninim.

²⁰⁻²¹God minim tep per per midep ak, Bi Kib cin Jisas lakañ ne yapil kimak minim tep nibak midep nep mideb. Lakañ ne yapil kimek God gek ne warikil Sipsip Mikep Bi Kib Yib mideb. God bin bi di tep gek kapkap mid tep ginigal ak, nibep ak rek nep tap tep ñek, tap tari tari God ginimib agnigab ak, ginigabim. Pen Jisas Krai midmagil nab cinop adan midil, God ne cinop bin bi tigeḡ bin bi rek mideniḡabin agnigab ak, Jisas Krai cinop gek nib akniḡ rek nep mideniḡabin. Nib ak, Jisas Krai yib nop per per nep agon ar amnaḡ. Nib akniḡ rek tep.

Minim dai ognap

²²Pen ai mam sikop. Mij ulep ñu kil tikesin nibaul, minim agebin ak niḡ tep gil dinimib.

²³Mam cin Timoti nop miñ lilak ak, miñi mis owip. Ulep apeniḡab ak, eip ninigabir.

²⁴Bi kib nibi okok abe, God bin bi ne okok abe, nibep magilsek “Midebim?” agebin. Krai bin bi ne kariḡ lim Itali nib okok nibep “Midebim?” agebal.

²⁵God nibep magilsek yimiḡ niḡil di tep gil kod mideḡ.